

Bajet 2022 ringankan beban kami

Lebih ramai golongan B40 bakal menerima manfaat menerusi peruntukan RM2.4 bilion, dalam bentuk Bantuan Keluarga Malaysia daripada Jabatan Kebajikan Masyarakat (JKM), seperti yang umumkan kerajaan dalam Bajet 2022.

Peruntukan itu bakal memanfaatkan lebih 440,000 isi rumah selepas syarat kelayakan kebajikan dinaikkan kepada Paras Garis Kemiskinan (PGK) Makanan 2019 iaitu RM1,169 berbanding RM980 PGK 2016, sebelum ini.

Merujuk statistik Laporan Anggaran Pendapatan Isi Rumah dan Insiden Kemiskinan oleh **Jabatan Perangkaan Malaysia (JPM)**, kemiskinan mutlak adalah pada kadar 5.6 peratus, melibatkan 405,441 isi rumah, pada tahun 2019 berbanding 7.6 peratus meliputi 525,743 isi rumah pada tahun 2016. Kadar kemiskinan bandar adalah 3.8 peratus manakala kadar kemiskinan luar bandar pada 12.4 peratus bagi tahun 2019.

Selain bantuan kebajikan, kerajaan turut memperuntuk sejumlah RM400 juta kepada pelajar B40 menerusi Rancangan Makanan Tambahan (RMT).

Ia bertujuan bagi memastikan pelajar daripada keluarga berpendapatan rendah, mendapat kandungan khasiat harian untuk pertumbuhan fizikal dan mental yang menyeluruh.

Pada 20 Januari tahun lalu, seramai 4,000 pelajar melibatkan 100 buah sekolah di seluruh negara terpilih sebagai peserta program penambahbaikan RMT.

<https://www.sinarharian.com.my/article/175820/BERITA/Nasional/Bajet-2022-ringankan-beban-kami>